



RAIZ su Perspectivanan

Statenverkiezingen Aruba 2024

raiz



Biba bon, biba contento!

RAIZ ta un plataforma cu ta angra su forsa den respet pa naturalesa, inclusion, participacion y harmonia pa logra prosperidad berdadero pa nos hendenan.

Prosperidad berdadero ta ser defini ora cu cambionan economico ta bay man den man cu naturalesa y unda ta reina dignidad financiero riba tur nivel den nos Pais.

Un Aruba unda dignidad financiero ta reina, ta e expresion di e deseo di **RAIZ** pa asina logra un sociedad unda tur ciudadano tin e posibilidad pa biba independiente, desaroya nan habilidad, hiba un bida sano den amplio sentido, cubri nan necesidadnan basico, y participa sin stress financiero of exclusion. Ta enfoca pa garantiza un ingreso digno, acceso na servicionan esencial, y eleva e capacidad di auto-determinacion. Un sociedad unda dignidad economico ta garantiza cu fondonan publico ta dirigi na necesidadnan y prioridadnan di su comunidad, invertiendo den capital humano y creando oportunidad pa bienestar, harmonia y prosperidad pa tur ciudadano.

RAIZ su vision ta pa un Aruba di excelencia, empodera y motiva pa kibra cu habitonan y obstaculonan cu ta fungi como cadenanan den e alma di nos comunidad.

Aruba ta cla pa libera di politica tradicional pa semper y realmente transforma den un comunidad sano y sigur.

E obhetivonan ta dirigi riba un transicion duradero pa logra sostenibilidad, eleva capacidad y cu un forsa di union y harmonia, prospera na excelencia.

RAIZ den Gobierno y den Parlamento a demostra di hiba un politica diferente basa riba integridad, husticia, respet, participacion, inclusion y creando impacto pa medio di evolucion.

E simianan a ser planta, y asina a hiba Aruba den e fase di transicion real pa un comunidad husto y inclusivo. Cu balor y normanan colectivo, bon angra, lo sigui cosecha e futuro di pais Aruba pa siguiente generacionnan, unda ta **biba bon, biba contento!**

RAIZ SU COMPROMISO



RAIZ ta kere fuertemente cu un programa di partido mester indica y inspira e balor, norma y principionan di su vision, motivacion y compromiso cu ta fungi como compas riba e caminda nos dilanti. **RAIZ** ta balora integridad, transparencia y dignidad economico unda cu cada ciudadano den nos pais mester biba un bida economicamente cu ta digno di su balornan. Nos ta sigui fortifica pasonan pa hiba nos pais den un direccion mas sostenibel teniendo na cuenta e resiliencia pa cambio climatico y e balansa entre infraestructura y naturalesa. Nos lo empodera e desaroyo di nos hendenan, oportunidad igual y inclusion den nos comunidad.

RAIZ ta compromete su mes na abo, paso hunto cu bo nos ta diseña e futuro di nos pais.



Cera conoci cu nos **candidatonan**



Contenido

Perspectivanan

| | |
|---|----|
| Economia y Finanzas cu Dignidad (costo di bida) | 6 |
| Energia | 12 |
| Labor | 13 |
| Economia Circular y Desperdicio | 14 |
| Vivienda y Infraestructura | 17 |
| Salubridad y Cuido sostenibel | 18 |
| Nos Adultonan Mayor ta keda un prioridad | 21 |
| Enseñanza | 23 |
| Social y Desaroyo Humano | 25 |
| Naturalesa den harmonia | 28 |
| Cambio Climatico | 29 |
| Turismo Responsabel | 30 |
| Change the System: Democracia fuerte | 31 |
| Relacion den Reino | 34 |
| Husticia y Seguridad | 35 |
| Bienestar di nos Animal | 36 |
| Agricultura, Cria y Pesca | 38 |
| Cultura y Arte | 39 |
| Deporte | 40 |
| Transporte | 41 |
| Aparato Gubernamental | 42 |
| Tecnologia | 43 |

Economia y Finanzas cu Dignidad (costo di bida)



Fundeshi di nos turismo y nos economia ta cu Aruba por presenta su mes na mundo como "One Happy Island". Aruba lo ta "One Happy Island" ora cu Dignidad Economico permiti tur nos hendenan hiba un bida feliz. Den e vision di RAIZ y di nos turistanan of bishitantenan, e producto principal di nos turismo ta nos hendenan. Meta di Gobierno mester ta pa sigura y mantene un modelo economico cu ta resulta den felicidad y un bida digno pa nos tur.

Principionan di DIGNIDAD ECONOMICO

Pa RAIZ e meta economico di nos pais mester ta pa sigura cu tur hende por hiba un bida digno. E principio di dignidad economico tin tres pilar social principal:

(1) **Igualdad.** Cada trahado/ciudadano mester por cuida pa su famia y gosa debidamente di e momentonan importante di bida, manera cria yiu, sin tin miedo pa inseguridad financiero. Esaki ta inclui accesibilidad sin distincion na cuida medico, educacion, y un salario digno.

(2) **Oportunidad.** Tur hende mester tin e oportunidad pa persigui su potencial maximo y haña sentido di bida, sin importa su situacion social of economico. Esaki ta causa cu mester duna hende e chens pa un di dos oportunidad y educacion, y kibra bareranan manera discriminacion y pobresa cu ta stroba hende pa logra su potencial completo.

(3) **Participacion liber.** Hende mester por contribui na e economia sin ta sometí na abusonnan of wordo explota. Trahadornan tin derecho riba proteccion contra practica laboral inhusto, consumidor mester proteccion contra abuso, comercio mester tin garantia di un 'level playing field' contra competencia di exterior. Di e forma aki ta sigura cu tur hende por traha y biba cu respet y e husticia cu nan merece.

ECONOMIA NOBO

- **Oportunidad igual.** Un gobierno transparente ta sigura oportunidad igual pa tur hende. Transparencia pa medio di tecnologia y cu sistema innovativo ta e forma con nos comunidad por monitor, controla y sigura su mes cu Gobierno ta reparti recursonan publico na un forma husto y balansa.
- **Cambio climatico.** E lucha pa diversifica economia di Aruba a cuminsa desde Status Aparte na momento cu e refineria di Lago a cera. Esfuersonan di casi 40 aña pa logra yega na un segundo pilar economico ainda no a duna resultado. Diversificacion ta necesario y lo mester sigui haci esfuerso pa logra esaki, pero pa RAIZ un segundo pilar economico no ta e unico forma pa sigura e economia di nos isla. E unico pilar

Economia y Finanzas cu Dignidad (costo di bida)



economico cu nos tin ta sumamente delicado y fragil pa impactonan di cambio climatico. RAIZ kier duna prioridad na proyectonan cu tin como meta pa fortaleze y proteha e pilar aki. Mas importante cu un segundo pilar economico ta pa proteha tur loke nos a logra te cu awor. Gobierno ta e prome yama pa inverti fondonan publico den proyectonan cu lo sigura cu nos economia lo por sobrevivi golpinan fuerte cu inevitablemente nos lo sufri pa motibo di cambio climatico.

- **Tres sector principal.** Tur sector den nos economia ta importante, pero RAIZ ta propone y desaroya tres sector cardinal pa fortalece y asina proteha loke nos tin.
(a) Sector Primario. Ministerio di Naturalesa a haci un esfuerso grandi pa stimula sector primario y den 3 aña a logra varios cambio den e sector aki. Mester sigui amplia y fortifica e sector aki como parti di proyecto dirigi riba 'food security' den un mundo cada bez mas insegur, y caminda prijs di cuminda na Aruba ta wordo determina pafo di Aruba.
(b) Orange Economy. E sector di industria creativo tin hopi potencial pa reforsa e industria turistico. Gobierno tin tur instrumento y fondo necesario pa por desaroya e sector aki di forma cu e por integra mas rapido den nos producto turistico. Loke falta ta e compromiso pa haci esaki.
(c) Silver Economy. Nos adultonan mayor tin necesidad grandi na vivienda adecuado y servicionan specialisa pa hende grandi. Den cooperacion cu gremionan y otro instancia a establece e prome Foro pa Adultonan Mayor den cual a haci inventarisacion di e necesidad y ta propone solucion. Tin amplio posibilidad pa comercio innovativo den e sector aki y den e proximo Gabinete RAIZ por sigui cu e proyecto y ehecuta e siguiente fase caminda sector financiero y Gobierno hunto lo amplia e productonan financiero cu ta necesario pa crea mas vivienda y servicionan dirigi na adultonan mayor.
- **Dialogo nacional.** Gobierno ta tuma decisionnan cu tin impacto financiero den tur cas y den comercio. P'esey ta necesario pa duna participacion debido na gremio, sindicato y representantenan. RAIZ a demostra un disponibilidad y habilidad pa traha den cooperacion cu sector priva riba tur tema. A duna participacion na tur gremio, sindicatonan, NGO's y otro instancianan pa traha hunto cu Gobierno na identifica problemanan y hunto yega na solucionnan. RAIZ lo sigui sirbi como un plataforma caminda henter nos comunidad por participa na mehora tur aspecto di e calidad di bida riba nos isla.

Economia y Finanzas cu Dignidad (costo di bida)



FINANSAS PUBLICO

Optimalisa Sector Publico pa medio di Landspakket. RAIZ lo sigui sostene e proyecto di Landspakket cu a wordo desaroya den cooperacion amplio cu Gobierno Hulandes cu e meta pa drecha funcionamiento di e aparato publico. RAIZ ta considera Landspakket e sistema corecto y efectivo pa optimalisa tur aspecto di maneho financiero y pa drecha efectividad di sector publico. E participacion activo di Gobierno Hulandes ta garantisa cu e solucionnan lo ta structural, duradero, sostenible y cu menos influencia politico partidista y indebido. Ademá di coregi erornan di pasado, mester reforsa relacion cu Reino riba tereno di finanzas publico pa asina evita tur posibilidad cu Gobiernonan lo ripiti e erornan aki.

- Impuesto, sector financiero y reforma economico. Ademá di e trayectonan pa drecha e maneho financiero y efectividad di sector publico, Landspakket tin tambe trayectonan cu ta trahando riba optimalisa tur temanan di impuesto, sector financiero y reforma economico. Cada trayecto den Landspakket ta wordo ehecuta den amplio cooperacion cu Gobierno Hulandes y ta wordo conduci na prome instancia pa nos profesionalnan di Aruba y cu apoyo di profesionalnan di Hulanda. Na un forma ehemplar, nan a identifica e areanan caminda e aparato publico ta deficiente y cu mester wordo drecha. Landspakket ta ofrece un fundeshi sano pa atende cu temanan cu a bay robez desde Status Aparte y cu tur gobierno anterior a negligisha.

Landspakket Plus.

Ademá di tur e temanan cu ya caba ta wordo atendi pa medio di Landspakket, RAIZ lo insisti pa inclui tambe e siguiente temanan como parti di e trayectonan cu ta trata finanzas publico y impuesto.

- Adapta e maneho di boet di belasting. Boet di belasting, hopi biaha pa motibo di fayó of ineficiencia di Gobierno mes, no ta fungi na un forma legitimo pa yega na fondonan publico. E tipo di entrada aki ta pone un presion grandi riba e comerciante chikito y mediano. E proceso pa rectificá y restitui ta complica y costoso, pues mester wordo optimalisa.
- Introduci programa di certificacion y excelencia pa departamentonan y servicionan publico como tambe den sector priva.
- Preparacion y participacion pa un introduccion di un VAT (na un tarief fiho), den termino medio/largo.

Economia y Finanzas cu Dignidad (costo di bida)



- Prioridad riba eficiencia den maneho di resitucion y bezwaar logrando asina di baha e presion di cash flow di companianan.
- Introduci kwartaal aangifte di belasting pa alivia e presion administrativo di e companianan chikito y mediano.
- Fortalece cumplimiento di belasting door di incorpora tecnologianan nobo (avansa) y formacion di capacidad.
- Simplifica e sistema di Impuesto riba tereno di Loonbelasting dunando alivio na e grupo di entreda medio.
- Sistema integra di tarifanan, impuestonan relaciona cu turismo/biahe na punto di entrada.
- Aumenta di impuesto di turismo pa crucero, na nivel cu por lo menos ta cubri e gastonan cu e tipo di turismo aki ta pone riba nos infraestructura, mercado laboral y costo di bida.
- Duna prioridad na e trayecto den Landspakket cu ta trata automatizacion di procesonan den e aparato publico, pa den termino corto hisa rendibilidad di e aparato, eliminando gastonan di sector publico y aumentando eficiencia.
- Baha e cantidad di desperdicio innecesario cu ta wordo importa riba nos isla. Pa logra esaki mester reevalua e porcentaje di impuesto na importacion riba productonan cu ta genera mas desperdicio. Esaki basa riba modelo di maneho di Extended Producer Responsibility (EPR), cu ta inclui e gastonan di procesamento di desperdicio di e articulonan cu ta ser importa.
- E trayecto den Landspakket dirigi riba reforma di impuesto mester inclui incentiva fiscal pa e "midden kader" cu ta esnan cu ta carga e economia y na e momento aki ta sinti e impacto mas fuerte.
- Redirigi fondonan di Aanvullend pensioen bek pa SVB. Lo pidi atencion den Landspakket pa e hecho cu actualmente 6 % di aanvullend pensioen ta bayendo sector priva siendo cu e fondo di SVB ta delicado.
- Reevalua y adapta e meta y funcionamiento di Volkskrediet Bank den su eficiencia, rol den financiamiento, y atende cu problematica di debe pa e cuidano den condicionnan financieramente vulnerabel.

Economia y Finanzas cu Dignidad (costo di bida)



Comision Nacional pa Inversion. Aruba falta un comision nacional caminda sector priva y gremionan por participa den e proceso pa escohe e inversionnan cu ta wordo haci cu fondonan publico. Na e momento aki ministernan ta liber pa inverti den projectonan cu nan ta scohe sin ningun input di comunidad. E capacidad di Gobierno pa crea debe nobo den futuro a wordo severamente limita, pero ainda a keda espacio pa malgastamento di fondonan publico na momento cu ta scohe inversionnan. E sistema di Landspakket lo coregi funcionamiento di aparato publico, finanzas publico, y nos economia. Pero no a regula e parti di inversion, lagando asina un 'loophole' pa malgastamento.

Costo di bida - gasolin. Como isla nos ta biba primeramente di productonan importa y prijs di productonan cu ta yega serca nos ta wordo determina pa inflacion pafo di Aruba. E solucion mester wordo busca na frontera mes. E super-surplus ta muestra cu Gobierno tin suficiente espacio pa reduci accijns riba gasolin substancialmente y kita tur invoerrechten for di productonan cu relaciona cu produccion di energia limpi. Pa haci esaki no mester warda riba Landspakket. Gobierno ta ricibi mas di 70 milyon florin na accijns y facilmente por corta esaki cu 50% of mas. E alivio den prijs di gasolin y gasto di transporte lo impacta e gasto diario di tur hende, tur dia, henter dia, y na un forma directo.

Costo di bida – energia. Gobierno tin tur instrumento den su man pa yuda pueblo genera energia limpi na cas. Produccion priva di energia limpi y renobable lo reduci grandemente e gasto di corriente en particular. RAIZ ta insisti cu no ta tarea di gobierno pa haci ganashi riba importacion di productonan cu ta haci transicion energetico posibel. RAIZ ta boga pa kita invoerrechten riba productonan cu ta crea energia limpi y renobable, pa baha costo di energia. Esaki ta justamente e forma adecuado pa Gobierno stimula transicion energetico y crea un oportunidad nobo cu comercio local por desaroya. Pa logra un transicion energetico tambe ta necesario pa sigui e formula di RAIZ caminda Gobierno ta coopera cu sector priva na beneficio di nos pueblo. Gobierno lo perde nada di su entrada pasobra ta trata di productonan cu actualmente no ta yegando Aruba den cantidad grandi entre otro pa motibo di impuesto cu tin riba nan.

Economia y Finanzas cu Dignidad (costo di bida)



Costo di bida – labor. RAIZ ta na fabor di regula y reconoce derecho di hendenan cu ta na Aruba indocumenta. E falta di trahadornan den sector priva ta haci cu comerciantenan mester paga mas na salario sin cu esaki ta traduci den un aumento di produccion. E aumento aki ta bay den prijs di producto of servicio sin cu necesariamente e producto a subi di calidad of e servicio a bira mas eficiente. E solucion pa e tipo di inflacion aki ta totalmente den man di Gobierno di Aruba. Comercio tin falta di trahador mientras cu riba nos isla tin miles di hende capacita pero cu no por drenta mercado laboral pasobra nan falta documentacion. RAIZ no ta papia di 'hende ilegal' pasobra no ta existi ser humano cu ta ilegal. Nan ta indocumenta. Yamando hende ilegal ta crea impresion di criminalidad, y ta atacha nan dignidad siendo cu hopi ta hendenan bon forma, capacita y dispuesto pa traha. Nos punto di salida ta cu ningun hende ta scohe pa laga nan cas, nan famia y amistades atras pa un aventura. Nos mester di nan mescos cu nan mester di nos.

Surplus maximo di 1% di GDP. RAIZ lo aproba presupuesto cu surplus mas grandi cu 1% di GDP solamente ora e surplus aki bin for di recorte den gastonan di Gobierno mes. A acorda cu Hulanda cu un surplus di 1% ta necesario pa baha e debe nacional na un forma responsable. Tur surplus mas grandi cu esaki lo ta placa cu a wordo ranca for di comunidad y comercio. Baha e debe na un forma mas accelera ta deseable, pero no ora esaki ta causa mas daño na dignidad economico di nos hendenan, hibando na costo di bida halto y pobreza scondi. Un reduccion substancial di gastonan di Gobierno ta posibel na momento cu yega na un arreglo nobo cu Hulanda pa loke ta un RAFT condiciona na financiamiento di debe nacional na interes hopi mas abou.

Bestemmingsheffing. Den proximo Gabinete, mester coregi e mal manera caminda belasting ta wordo implementa pa un proposito pero e placa ta wordo gasta pa cosnan totalmente diferente. Ehempel, no tin un relacion directo entre 28 miyon florin di belasting riba motorrijtuigen y gastonan di mantencion di nos careteranan y infraestructura. Asina tambe ta cobra 14 miyon florin tur aña na milieubelasting (environmental levy) cu no ta wordo aloca na naturalesa y medio ambiente. Respeta e principionan di 'bestemmingsheffing' ta duna mas transparencia y ta cumpli cu e leyman correspondiente.



Crea un perspectiva sostenibel y independiente di energia pa nos comunidad door di acelera e transicion na energia renobabel, maximalisa eficiencia di energia, y promove solucionan innovativo di energia. Aruba lo ta lider den practicanan di energia sostenibel, manera energia limpi, pagabel y accesibel pa tur hende.

- Produci mas energia renobabel capitalisando riba recursonan cu Aruba tin na abundancia, cual ta solo y biento.
- Acelera e transicion energetico pa medio di un infraestructura mas robusto, unda cu e personanan cu ta desea di tin panel solar por haya esaki sin mucho restriccion.
- Bende e energia renobabel genera cu nos sector turistico na un prijs unda cu nos pueblo por sali beneficia. Percura pa prijs di coriente residencial y pa negoshi chikito ta atractivo uzando nos sector turistico pa subsidia e prijs di coriente pa nos hendenan. Resultado ta, un costo di bida y costo di haci negoshi mas abou y atractivo.
- Uza producto fossiel pa garantiza suministro di coriente y awa te na momento cu energia renobabel cu bateria ta mas atractivo.
- Crea empleo den e sector di energia limpi door di keuring, instalacion di panel solar, charger pa auto electrico etc. Lo crea empleo den e transicion di energia unda cu digitalisacion lo hunga un rol crucial pa garantiza un grid robusto y confiabel.
- Habri un planta di "E-fuel" uzando energia di solo cu biento pa propio uzo.
- Inverti den parke solar pa e personanan cu no tin nan propio cas, como cu nan tambe mag beneficia di e transicion energetico.
- Crea mercado di "Carbon Credits" unda cu un inversion den energia renovabel lo bira financieramente mas atractivo.
- Haci uzo di rapport di TNO pa e transicion energetico y pa yega na fondo.
- Integra transporte (vehiculo di pasahero) den e transicion pa un Aruba mas limpi y menos dependiente di importacion di azeta. Decarbonisa transporte y e industria di energia.
- Organisa un departamento (directie) pa regula prijs di awa y coriente na beneficio di e pueblo Arubano.
- Capitalisa riba energia di solo y biento den combinacion cu bateria pa warda energia pa ora tin necesidad.



Como parti di e vision pa un economia cu dignidad, RAIZ ta comprometi pa desaroya un mercado laboral resiliente y inclusivo cu ta duna prioridad na bienestar y integracion di nos forsa laboral, promove practicanan sostenibel di trabou, y fomenta condicionnan husto pa tur sector. E vision ta pa garantisa cu cada trahado por florece den un ambiente saludabel, sigur y contribui na un economia adaptabel, integra culturalmente y prospero.

- Lo atende cu e scarsedad di trahado cu e meta pa trece nos hendenan den exterior bek, stimula esnan cu t'ey pa keda, facilita adulto mayornan cu ta desea pa keda activo, y si tin cu importa lo haci esaki door di un maneho diferente.
 1. Revisa ley laboral unda lo introduci legislacion, maneho y ehecucion pa siguridad y salud laboral (OSH), den cual ta elimina un salario minimo general y ta ancla condicionnan laboral colectivo pa cada sector.
 2. Regulando y enforsando un maneho di migracion laboral cu enfoke pa migracion di famia en bes di individuo. Cu esaki ta logra fortifica e red social di e trahadonan migrante, e placa di nan labor ta keda circula den nos propio economia y por introduci maneho efectivo di adaptacion na nos cultura, norma y balor pa e famia migrante.
- Introduci un 'Arbowet' pa segura condicionnan di trabao saludabel y cu ta tene cuenta cu efectonan di cambio climatico.
- Programa pa certificacion di calidad y inspeccion di OSH y establece controlnan pa maneho di riesgo pa industria y comercio.
- Percura y facilita cu Adultonan Mayor cu ta desea di keda riba e mercado laboral por haci esaki pa keda activo y alabes den areglo fiscal faborabel.
- Introduci modelonan di Trabou Flexibel (remote/hybrid) pa contribui na un sociedad resistente, innovativo y moderno. Creando un miho balansa entre trabou y bida personal.
- Intensifica e conexion entre e mercado laboral y enseñanza, pa atende cu desconexion entre e factornan aki y percura cu Aruba mes por produci y anticipa e necesidadnan riba e mercado laboral y adapta e educacion riba esaki. Esaki lo contribui tambe na un maneho mas efectivo di imigracion.
- Haci e mercado laboral mas inclusivo pa hendenan cu un limitacion fisico of den nan desaroyo door di ofrece:
 - guia na esnan cu limitacion ora di aplica pa trabou.
 - adapta leynan pa inclui un % di e mercado laboral cu tin cu consisti di personan cu limitacion.

Economía Circular y Desperdicio



Economía circular ta un modelo económico cu ta focus ariba reduci desperdicio y sacando máximo provecho di recursonan cu ya ta disponibel. Tambe pa haci un cambio for di ta uzando material deriva for di recursonan natural finito (explotación), por ehempel petróleo y/of gas, pa ta diseñando y produciendo productonan for di materialnan sostenibel y renobabel p.e. hemp, linen, bambú y tambe nos solo, biento y lama. E sistema circular ta enfatisa ariba re-uzar, recicla y reduci material y productonan pa asina crea un sistema di un círculo sera.

RAIZ ta e pionero den e transición pa un economía circular.

- Door di sostene negoshinan local cu ta adopta practicanan circular lo yuda fortalecer nos economía local. Esaki ta mantene placa den nos país y ta crea mas oportunidad pa inverti directamente den desarrollo positivo di nos comunidad y fortalece nos resiliencia.
- Aumenta innovación y adaptabilidad. E transición pa un economía circular ta stimula innovación y creatividad den diseño y producción di producto y servicicionan. Asina creando solucionnan nobo, innovativo, ahusta y mas eficiente pa atende cu retonan cu nos por topa cune den nos sociedad incluyendo p.e. cambio climatológico y scarsedad di recurso.
- Empodera escogencia di consumidor den cual ciudadanonan tin participación mas directo, mas informa y empodera den nos economía. Cu mas opción di escogencia nos ciudadano por scoge con nan ta consumi y den ki manera ta promove y duna un bos y poder na practicanan sostenibel den nos sociedad. Asina directamente contribuyendo cu nan accionnan pa un dirección mas sostenibel, mas saludabel, cu mas oportunidad igual y cu abundancia cu ta yega te sobra.

Desperdicio Sólido

- Continuación di e restructuración di e sistema di desperdicio sólido pa modernización y circularidad.
- Diseña un estrategia neutral na inflación pa introducir y establece sistema Extended Producer Responsibility (EPR) pa diferente grupo di producto cu ta inclui meta di recicla (e-waste, empaque di producto, teer, etc.). E manejo aki ta muestra cu responsabilidad no ta cai mas riba gobierno (so) y e gastonan relaciona pa colección y procesamiento lo move di e final di vida di un producto, pa atende cu esaki for di ora di importación. Un organización independiente lo keda encarga pa colecta, maneja, y distribui e gastonan entre stakeholdernan di desperdicio. E modelo di manejo ta stimula modelonan di negoshi 'zero waste' of di re-utilización y ta descurasha modelonan linear cu e resultado pa disminuir generación di desperdicio.

Economía Circular y Desperdicio



- Disminui e volumen na landfill sanitario (Ser'i Teishi) pa stimula un aumento den capacidad di reciclahe den sector di desperdicio pa output riba mercado local. Por ehemplo tire, plastic, glas, desperdicio organico y zeta di motor. Disminui generacion di desperdicio pa expande productonan cu ta inclui den Landverordening Milieu Schadelijke Producten (LvMSP).
- Finalisa LvAfvalstoffen, inclui ratificacion di 'Basel convention' pa aumenta e exportabilidad di cierto tip di desperdicio.
- Maximalisa recuperacion di material pa medio di entro otro:
 1. Establece Parke Circular Aruba (Baki den Bario permanente).
 2. Reevalua e fluhonan di desperdicio pa introduci separacion pa diferente tipo di desperdicio cu e meta pa separa tur desperdicio organico for di e desperdicio tecnico), y esaki stimula un grado di reciclahe mas halto.
 3. Serlimar: Stimula Serlimar pa drenta den mercado di procesamento of maneha Parke Circular Aruba y asina mehora accesibilidad pa colaboradornan (artistanan, maker labs, repair cafes y recicladoronan) pa re-utilisa, re-diseña y recicla.
 4. Asbesto: Establece un fondo pa subsidia removimento y disposicion apropiada di asbesto segun regulacionnan di DTI.
 5. Parkietenbos; Finalisa saneamento di landfill Parkietenbos y restaura esaki pa un parke solar. Esaki ya caba ta den proceso y e trabaonan lo continua den proximo gubernacion.
- E maneho regulatorio lo enfoca riba entre otro;
 1. Aumenta capacidad di monitoreo y control (door di hermentnan tecnologico y upskill/training).
 2. Update ley y articulonan ambiental pa inclui base legal di boet administrativo (proteccion di naturalesa, APV, hinderverordening, etc.).
 3. Digitalisa procesonan clave pa eficiencia y transparencia.
 4. Fortifica LV Hindervergunning (permiso di molester).
 5. Optimalisa begunstigendbeleid Free Zone Aruba dirigi riba desperdicio y medio ambiente.
 6. Prohibicion di mineria di recursonan natural (e.g., santo / excavacion) y baha e gastonan di importacion pa e tiponan di recursonan aki como tambe explora otro recursonan (local) y oportunidadnan, talves como parti di e estructura di EPR (e.g., reciclahe di glas).

Economía Circular y Desperdicio



- Reduci densidad di desperdicio di 50% pa 2029 door di programanan nacional di concientisacion, educacion y accion (Mi Bario Limpí).
- Sigura accesibilidad na servicionan di coleccion di desperdicio (EPR) pa tur hende (incluyendo e hende sin documento y di menos posibilidad economico-social) di forma cu por elima dumpnan ilegal ('midnight dumping').

Desperdicio Likido

- Establece un organismo di supervision pa Aruba Wastewater Sustainable Solutions(AWSS), por ehempel: DNM, DVG, DTI, DOW & ACF, pa segura cu ta cumpli cu standard di operacion y permiso di molester (salud, medio ambiente, siguridad), como tambe monitorea e volumen/calidad di awa na e Western Wetlands.
- Adapta sistema di otorgacion di permiso pa transporte di awa residual, incluyendo tecnologia obligatorio pa monitorea desperdicio asigna.
- Sigui explora y enfoka riba solucionnan pa tipo di desperdicio likido problematico, incluyendo e tipo di kimico, awa di piscina, awa di laundry y FOG (Fat, Oil, Grease).
- Adapta e codigonan/permisionan pa edificio (residencial y comercial) pa mehora diseño di tanki septico pa awa preto y stimula/aumenta re-uzo di awa shinishi (cu standard pa uzo di kimico).
- Establece maneho di awa, legislacion y regulacion integra pa logra sostenibilidad di awa, lama, awa di yobida, reservanan di awa/dam, fluho di awa/rooi, wetlands, awa di profundidad y awa residual (awa cu ta resta).
- Establece coleccion di awa decentralisa den diferente distrito y regionnan ('Awa den Bario') den relacion cu maneho centralisa di awa (grid).
- Rediseña codigonan pa edificio comercial y residencial cu capacidad minimo obligatorio pa coleccion di awa.
- Establece un programa pa maneho di inundacion di awa (rediseña infraestructura urbano y di transporte pa maneho di riesgo di awa).

Vivienda y Infraestructura



Aruba conoce un escasez den vivienda pagabel cu mas y mas ta duna indicacion cu mester bin cu plannan sostenibel. RAIZ ta para pa crea mas vivienda den nos comunidad cu ta fortifica e posicion di nos hendenan pa yega na un propio hogar.

- Establece un ministerio di Desaroyo Urbano y Vivienda pa duna e desaroyo den e infraestructura aki prioridad.
- Rediseña programanan di vivienda social pa inclui programanan di vivienda pagabel y cu ta mas inclusivo.
- Haci un analysis di propiedadnan y tereno cu no ta wordo uza pa por reintegra esakinan a base di maneho den mercado pa amplia oportunidadnan pa yega na un cas.
- Introduci un sistema cu ta aloca subsidio pa famianan y young professionals pa por yega na nan propio vivienda.
- Meta pa construi mas di 5000 cas cu ta pagabel ('Vivienda den Bario').
- Rediseña codigonan di construccion pa vivienda y desaroyo di areanan residencial cu rekisito obligatorio pa naturalesa/area berde. Asina nos ta construi cu naturalesa.
- Establece coleccion di awa decentralisa den diferente distrito y regionnan ('Awa den Bario') den relacion cu maneho centralisa di awa (grid). E transporte di awa ta caro, door di decentralisa e maneho di awa, gastonan ta baha.
- Rediseña codigonan pa edificio comercial y residencial cu capacidad minimo obligatorio pa coleccion di awa. Asina nos ta evita desperdicio di awa y stimula reciclahe.
- Establece un programa pa maneho di inundacion di awa (rediseña infraestructura urbano y di transporte pa maneho di riesgo di awa).
- Lo enforca e ley di 'Build with Nature' pa construccion y mantencion di infraestructura
- Maximalisa e cooperacion y alignment den aanlegvergunning y naturalesa, cual ta haci miho control posibel.

Salubridad y Cuido Sostenibel



Cuido medico ta nos derecho civico, pero su obhetivo mester ta preveni malesa y mehora calidad di bida. Si nos kier cuida medico centra den e persona, cu ta sostenibel y di calidad halto, nos mester cuminsa for di prevencion y fortifica nos cuida medico den tur e areanan cu falta atencion sin exclui ningun. E vision ta dirigi na promove un sistema di cuida centra riba e persona enbez di e un modelo di cuida centra riba patient. Un sistema centra riba persona ta enfatisa e importancia no solamente ora un hende tin un malesa pero tambe ta duna atencion na factornan social, cultural, y ambiental cu ta influencia salud. E modelo aki no ta solamente tuma den cuenta e necesidad medico di e individuo, pero tambe su famia, comunidad, y rednan di apoyo, promoviendo un di cuida mas holistico. E sistema aki ta mas husto, flexibel, y responsabel pa e necesidadnan tipico di nos poblacion.

- E cuida pa nos salud ta cuminsa door di organisa un sociedad saludabel unda "Preveni ta miho cu cura". Inverti den un bida saludabel y prevencion di malesa, pa asina nos por sigura cu tur hende por sostenenan mes, y garantisa cu tur hende tin acceso na bon enseñansa, bon cuida, aire limpi, awa limpi, alimentacion saludabel y un ambiente di bida agradabel.
- Fortalece cuida pa hende den condicionnan vulnerabel (incluyendo sistema di cuida).

E estructura di cuida/AZV

- Percura pa AZV tin un modelo financiero cu ta sostenibel, duradero y incluso. Si nos kier diversifica cuida y lo cual AZV ta cubri, mester tin mas fondo den un forma sostenibel y duradero.
- Mester adapta nos leyman di cuida pa inclui cuida preventivo, curativo y cronico.
- Full e cadena di cuida mester resorta bou di un solo fondo, pa un maneho mas efectivo di e fondonan.
- Cambia AZV di un ziektekostenverzekering pa un Arubaanse zorgverzekering, ta crea un maneho di cuida mas efectivo y mas incluso.
- Miho uzo di e fondonan di AZV door di haci e edificionan di cuida mas sostenibel (isola edificionan miho, haci uzo di solar panels por ehempel).
- Mehora y fortifica e colaboracion entre tur institucionan medico nacional como tambe den Reino Hulandes pa reduci gasto operacional y medicina/material.
- Introduci sistema pa evita perdida di fondo for di cuida exigiendo cu turistanan tin un

Salubridad y Cuido Sostenibel



seguro di cuidado ofreci na Aruba mes, cu ta permiti cu e ingreso di fondo permanece pa cuidado di Aruba.

- Inclui principianan circular pa desperdicio medico.
- Ofrece salario competitivo den e sector di cuidado. Asina nos ta atrae profesionalnan entre otro yiu di tera pa bin bek y aporta na e sector di cuidado unda specialmente tin un necesidad.
- Ofrece educacion continuo den sector di cuidado pa por fortifica conosemento y e profesionalismo.
- Verbruiksbelasting riba productonan cu ta detrimental pa salud, como accion preventivo y cu tin sosten amplio den e sector di cuidado. Esaki tambe por contribui mas fondo pa cu cuidado na Aruba. Di e forma aki logrando financiamiento pa e proyectonan di prevencion den cuidado.

Ampliacion di e pakete basico di AZV

Unabes cu tin fondonan sostenibel di AZV lo amplia (e pakete basico) cu lo siguiente:

- Inclui Ergoterapia den e pakete basico di AZV. Esaki ta un forma di terapia cu ta yuda esnan cu a perde cierto habilidad motorico pa por funciona atrobe.
- Establece un Kinderrevalidatie Centrum of un Medisch Kinderdagverblijf na Aruba, unda ta centralisa cuidado y terapianan necesario pa muchanan cu retonan fisico of di desaroyo.
- Inclui ayudo psicologico den e pakete basico di AZV pa percura cu ayudo ta yega na e persona den un etapa trempan y evita cu e problemanan psicologico/ emocional lo sigui desaroya den un problema mas severo/psiquiatrico of den mas area di bida.
- Obesitas den nos comunidad (STEPS ta indica cu 79% di nos poblacion tin obesidad) tin un efecto negativo riba e desaroyo economico di pais Aruba. SER a publica un rapport (augustus 2024) unda cu ta subraya e importancia di inverti den e capital humano, entre otro e desaroyo y e salud di bo comunidad. Acceso na guia y informacion adecuada pa lo cual ta alimento ta esencial. Door di inclui dietistanan den e pakete basico di AZV, bo ta haci guia di alimento mas accesibel pa hende, stimula hende pa tin un bida social- economico di calidad halto y bo ta stimula bo productividad laboral y bo economia.
- Financia y fortalece cuidado cronico na Aruba (por ehempel: rehabilitacion, cuidado di adulto mayor, cuidado di muchanan, cuidado mental, adiccion y cuidado pa hende cu un limitacion).

Salubridad y Cuido Sostenibel



- Amplia e tareanan di comision di indicacion (Indicatie Commissie) pa por garantisa cuidu adecua na e luga adecua.
- Expande servicio (para)medico na e luganan fuera di hospital of SABA.
- Cuido preventivo lo ta prioridad pa atende cu e situacion preocupante cu e ambicion pa reduci e personanan cu malesanan cronico cu 50% den 10 aña.
- Sistema Nacional di Salud Integra Electronico/ digital unda lo yuda crea un sistema di cadena di cuidu (zorgketen) solido y continuo cu intercambio di data entre tur actor den cuidu di salud pa mehora siguridad y calidad di cuidu di pashent. Unabes cu colecta data atraves di un sistema nacional di salud integra electronico, por uza e data pa desaroya maneho efectivo y preveni gastonan innecesario.
- Explora posibilidad di inversion den innovacion, incluso aplicacion di AI, telemedicina, E-salud, y cirugia robotico.
- Sistema integra di compra producto den comun y colectivo tanto pa HOH, IMSAN, Laboratorionan, y casnan di cuidu.
- Haci un encuesta nacional pa conclui cuanto y ki tipo di experiencanan traumatico tin den nos comunidad mirando cu investigacionnan ta muestra cu esaki por hiba na desaroyonan di trastorno y malesanan cronico (ACE study). Asina por aplica maneho dirigi riba tratamiento di trauma na un edad trempan pa evita e desaroyo di trastomonan y malesanan.

Nos Adul-tonan Mayor ta keda un prioridad



Un pais orguyoso di su raiz ta balora y cuida su fundeshi pa garantisu su durabilidad. Nos Adul-tonan Mayor ta nos tesoro. Garantisa nan calidad di bida, bienestar general y cuidu, ta nos compromiso y deber moral. RAIZ a demostra di ta sirbi nos Adul-tonan Mayor, door di establece e prome ministerio di Asun-tonan di Adulto Mayor den historia di Aruba, como tambe instalacion di Directie Ouderenzaken.

Ehecucion di Deltaplan 2023- 2033, cu ta basa riba un transformacion di perspectiva medicalisa pa un perspectiva socialisa di embehecimiento;

Pun-tonan di ehecucion di e plan ta encera;

- E Cuido Adecua, cu introduccion di categorianan di necesidad di cuidu.
- Biba mas largo den ambiente familiar, cu sosten y ayudo di iniciativanan social y cuidadanan informal (mantelzorg/ familia).
- Conexion entre proveedor di cuidu formal, iniciativanan particular y cuidu informal.
- Reforma di financiamiento di cuidu pa nos adul-tonan mayor pa por logra sostenibilidad husto den relacion cu e calidad y necesidad di cuidu.
- Optimalisa participacion den comunidad den un sentido amplio. Entre otro lo enfoca riba stimula programanan social y fisico den nos Centro di Barionan, crea servicionan adapta na e necesidadnan di e grupo 60+.
- Atende cu scarsedad di cama y cuidu, promoviendo mas cooperacion entre casnan di cuidu como tambe otro instancianan pa por subi eficiencia operacional y purba na reduci e gastonan.
- Garantisa calidad di cuidu cu un plan integral di condicionnan pa permiso di establecimiento di casnan di cuidu priva.
- Establece centronan di Pasadia gratuito (subsidiu), cual lo duna alivio na e cuidadonan informal (familia), y asina percura pa cuidu mientras ta mantene e adulto mayor mas largo den un ambiente familiar.
- Introduci y fortifica servicionan social cu realmente ta adapta na e necesidadnan di e adulto mayor, cu entre otro;
 1. Respijtzorg: cuidu intermural (den cas di cuidu) temporario pa duna alivio na e cuidador informal.
 2. Crisisopvang na unda por atende e adulto mayor den momento di crisis sin cu e mester yega hospital, y asina observa y percura pa e ricibi e cuidu adecua.
 3. Revalidacion Geriatrico pa evita cu despues di un operacion of trauma fisico por

Nos Adultonan Mayor ta keda un prioridad



sigui guia y sostene e proceso di revalidacion.

4. Transfer afdeling pa cuidado y observacion prome cu drenta hospital, asina por desminui problematica di "verkeerde bedden".

- Inversion den viviendanan adapta pa adulto mayor garantizando nan independencia, auto-determinacion y participacion general.
- Introduci "Smaller gaps, greater connection" cual ta programanan escolar y den bario pa conecta e Adultonan Mayor y e generacion hoben, fomentando respet mutuo, ensañanza (informal) comparti cu ta beneficia ambos grupo den comunidad.
- Promove participacion laboral door di ehecuta e 11 recomendacionnan di e consejo di SER 2023 pa por mantene adultonan mayor cu ta desea, pa keda mas largo activo riba e mercado laboral. Entrenan:
 1. establece un uitzendbureau- talent hub pa Adultonan Mayor.
 2. percura pa incentiva fiscal pa Adultonan Mayor cu ta desea di keda riba e mercado laboral despues di yega edad di pensioen. Di e forma aki tambe ta reduci e presion di falta di personal riba mercado laboral.
- Crea permiso specifico pa transporte di Adulto Mayor pa garantiza nan movilidad, seguridad y participacion.
- Crea un meldpunt y meldcode pa maltrato contra Adulto Mayor, cu su debido vangnet.
- Fortifica SABA pa bira un cas di cuidado completo cu bon colaboracion cu e casnan di cuidado di Aruba, cu un bon alocacion di categoria di cuidado (zorgzwaarte).
- Amplia e tareanan di comicion di indicacion (Indicatie Commissie) pa por garantiza cuidado adecua na e luga adecua.



Educacion y enseñanza ta e motor pa realisa e soño di nos Pais. E ta empodera, ekipa y forma nos hendenan. E ta e fundeshi pa un pais resiliente, sostenibel, y armonioso. Educacion y enseñanza mester por ta dinamico pa atende cu desaroyonan local y mundial, percurando di ta accesibel pa tur mucha y tur hende. Nos docentenan y maestronan mester wordo balora pa locual nan ta nifica no solamente pa nos muchanan pero tambe pa e formacion di nos economia y nos comunidad.

RAIZ ta priorisa e derecho di cada un pa educacion y enseñanza di calidad, innovativo y inclusivo.

- Inversion den maestro y docente pa asina nan ta mas ekipa pa e innovacionnan den enseñanza, cu habilidad y conocimiento.
- Revisa y ahusta e “functiehuis” cual ta e salario di maestro, incluyendo un reevaluacion di e cantidad di ora cu ta wordo considera voltijd, pa duna balor di nan estudio y trabou.
- Ahusta y actualisa nos leyman pa asina por mehora e calidad di enseñanza.
- Percura pa siguridad di trabou (baangarantie) pa docentenan, relaciona cu un caida di cantidad di alumno.
- Reduci e cantidad di alumno pa cada maestro y duna nan e ayudo necesario por medio di un asistente di klas.
- Introduci un plataforma di educacion nacional na un forma integral pa asina por traha cu un mesun meta y vision riba tur area di formacion.
- Introduci ‘trauma sensitief werken’ na scolnan, unda cu ta tene cuenta cu trauma y comportacion relata na trauma di alumnonan cu mester ahustenan den ‘aanpak’ na scol.
- Facilita muchanan y hobenan cu un malesa cronico of un trastorno psiquiatrico pa sigui ricibi les na of pafor di scol di un manera cu ta acomoda na nan limitacion nan.
- Expande e oportunidadnan pa muchanan cu necesidad special por sigui un estudio avansa, por ehempel un voortgezet special onderwijs.
- Oportunidad pa sigui of reingresa den enseñanza unda por studia riba termino corto y of tambe digital pa logra haña certificado y of diploma acredita pa por haña e trabou desea. Sin laga afo e habilidadnan di bida (life skills).
- Un curiculo cu ta concentra tambe riba e alumno su interes, talento y habilidad y no solamente intelectual. Expande e curiculo cu tecnologia, agricultura, arte y deporte



como posibel opcion pa sigui studia.

- Lo evalua e concepto di Esports (Electronic Sports) como forma extra-curricular pa promove ingenieria, tecnologia, arte, matematica, mientras ta traha riba e aspecto social- emocional y ta stimula mas inclusion.
- Inverti den infraestructura na scol pa por acapara innovacion di e curiculo, y inverti den mantencion di edicionan escolar.
- Adapta sistema di scol regular pa por inclui alumno nan cu necesidad special. Crea 'zorgklassen' den scolnan regular, pa logra cu scol nan ta inclusivo y ekipa pa brinda e enseñanza di calidad y adapta.
- Stimula transparencia den alocacionan y distribucion di fondonan den enseñanza.
- Facilita 'bijzonder verlof' pa docente/maestro ora ta trata e calidad di nan bida personal.
- Enseñanza no ta depende solamente di nos docentenan. RAIZ lo dedica atencion y inverti den klassenassistenten, leidsters (Traimerdia) y otro trahadonan den e sector, procurando pa mas posibilidad pa nan desaroya y mas seguridad di empleo.
- Flexibilidad di e uzo di ATV- dagen pa duna e docente/maestro mas flexibilidad di escogencia.
- Introduci stageplekken mas trempan pa asina alumnonan por tin un miho conosemento di e mercado laboral y asina nan ta forma un impresion y un idea di e mercado laboral.
- Un revision di e efectividad di MDC (Multidisciplinare Centrum) pa locual ta e procesonan cu alumnonan.
- Percura pa mucha cu kebrante di salud pa un periodo largo por sigui lesnan digitalmente.
- Evalua e calidad di materia, recursonan, les y toets cu ta wordo duna, pa garantisar calidad di enseñanza.
- Re-introduci e servicionan di e Jeugdzorg arts pa bishita y haci chekeo cu muchanan den klas.
- Dedicar atencion na e efectonan di bullying y social media riba e salud mental di nos muchanan.
- Tene debito cuenta cu e diferente circunstancianan di diferente scol y nivel di ensenanza ora desaroya maneho nobo (no 'one size fits all solutions').
- Evalua e calidad di materia, recursonan, les y toets cu ta wordo duna, pa garantisar calidad di enseñanza.

Social y Desarrollo Humano



Un comunidad cu ta prospera den excelencia ta enfoca riba balor nan colectivo, elevacion continuo di calidad y standard, ta ancla responsabilidad y transparencia como tambe ta percura pa acceso continuo na educacion. E lucha pa nos muchanan nunca por para tanten nos no garantisana nan bienestar y cumpli cu nan derecho di biba protegi, sano y feliz. Lo kibra bareranan cu ta obstaculo den nos realisacion, cu un vision pa crea un comunidad cu ta florece, empoderando tur, desde chikito pa logra su maximo potencial como ser humano.

RAIZ lo sigui lucha pa e mucha y empodera nos hendenan.

- Finalisa e Ley di Iniciativa pa inclui derechonan di mucha den nos constitucion, incluyendo e derecho di no wordo abusa (emocionalmente, fisicamente y sexualmente). Door di pone derechonan di mucha den e ley mas halto di nos pais, nos ta ancla un posicion solido di nos muchanan y hobenanan pa loke ta maneho y leyman.
- Intervencion intensivo pa muchanan di 0-8 aña cu ta lanta den un barío di menos recurso pa kibra ciclo di pobreza. Programanan cu ta enfoca riba desaroyo di lenguahe y cognitivo ta fortifica e desaroyo di tal manera cu ta haci e probabilidad mas halto cu nan lo tin exito den nan carera di scol y posicion financiero den bida despues.
- Establece un Minimumstraf pa pedofiel cu ta comete actonan sexual cu muchanan menor di edad. Aruba tin un problema grandi di adultonan cu ta comete actonan sexual cu muchanan menor di edad. E ta importante pa e victima haya husticia. Un minimumstraf ta añadi na esaki.
- Elimina libertad condicional pa pedofielnan condena, mandando asina un mensahe clave cu Aruba ta proteha nos muchanan.
- Introduci facilidadnan di actividad pa muchanan cu tin un trastorno di desaroyo, por ehempel muchanan cu autismo of ADHD.
- Eleva funcionamiento y efectividad di Family Justice Center. Family Justice Center ta ofrece ayudo centralisa pa victimanan di agresion sexual.
- Mas casnan y famianan di cuida pa muchanan/ hobennan cu no por sigui biba na nan propio cas. (Den extension di Casa Cuna y Imeldahof)
- Wak e posibilidadnan pa hendenan den nos comunidad cu ta huur cas di FCCA pa por cumpra esaki.
- Reparacion di speeltuín y veldnan di sport cu ta inclui un plan di mantencion sostenibel.

Social y Desaroyo Humano



- Outreachend care pa hobennan cu tin problemanan relata na LVB (lichte verstandelijke beperking).
- Establece un Kinderrevalidatie Centrum of un Medisch Kinderdagverblijf na Aruba, unda ta centralisa cuida y terapianan necesario pa muchanan cu retonan fisico of di desaroyo. Un caminda cu tur specialista ta centralisa pa traha hunto den bienestar di e desaroyo di e mucha. Un mucha, un plan.
- Inclui ayudo psicologico den e pakete basico di AZV. Lista di espera pa adultonan por haya ayudo psicologico ta largo. Incluyendo ayudo psicologico den pakete basico di AZV bo ta percura cu ayudo ta yega na e persona den un etapa trempan y evita cu e problemanan psicologico/emocional lo sigui desaroya den un problema mas severo/psiquiatrico of den mas area di bida.
- Introduci programa **"CONNECT TO THRIVE"** na departamento di Asuntonan Social. Cu e meta pa den 2035 logra participacion di 50% di famianan bou condicionan financieramente vulnerabel basa riba e datos di censo, aumenta actividadnan den barionan cu 50%, logra un reduccion di 50% di e total di personan riba bijstand door di ehecuta e programa cu ta existi di tres componente:
 1. 'Break through to thrive' diseña riba sanacion, conexion y empedoracion di tanto e individuo como su famia. Den esaki lo haci un encuesta nacional pa conclui cuanto y ki tipo di experiencianan traumatico tin den nos comunidad mirando cu investigacionnan ta muestra cu esaki por hiba na desaroyonan di trastorno y malesanan cronico (ACE study). Asina por aplica maneho dirigi riba tratamiento di trauma na un edad trempan pa evita e desaroyo di trastornonan y malesanan.
 2. 'Empower to thrive' como programa di mentorship entre departamento di Asuntonan Social y Labor, pa ehecuta programanan guia pa Entrepreneurship di famianan financieramente vulnerabel, y realizacion personal. Parti di e programa aki ta revision y adaptacion di Ley di Bijstand pa por acapara e necesidadnan di e personan riba bijstand y yudanan mantene nan activo, crea e posibilidad pa sigui desaroya nan habilidadnan y logra nan independencia.
 3. 'Thrive in Unity' cu ta enfoca riba cohesion social y forsa colectivo den bario y districtonan. Introduci embahadornan di bario cu ta trece den un comision hunto cu minister di Asuntonan Social, e retonan y desaroyonan di e bario cu nan ta representa. Asina por tin un miho bista general di kico ta desaroya den cada bario y kico e necesidadnan ta pa cu maneho.

Social y Desarrollo Humano



- Eleva servicio di Departamento di Asuntonan Social cu plan di digitalisa servicionan cu e departamento ta ofrece, pa por sigui procesonan di aanmelding y coleccion di data pa por traha maneho mas efectivo, revision y inventarisacion di servicionan social existente den cual ta adapta esakinan cu servicionan y profesionalnan adecua y bon ekipa. Di e forma aki na un manera efectivo por fortifica e cadena di servicio (zorgketen) pa eleva accesibilidad.
- Un plan di intervencion cu ta inclui un opvangplek pa hobenan cu ta den of cu ta drenta prostitucion of den un relacion cu 'loverboys'. Un intervencion cu ta tene cuenta cu e bario y contexto di unda e hoben ta bin y lanta den dje.
- Expande e edificio y personal di Orthopedagogisch Centrum unda nan lo por ricibi hobennan cu probleman psiquiatrico mas severo.
- Inverti den mas conocimiento y capacidad humano den Casa Cuna y Imelda Hof.
- Crea permiso specifico pa transporte di Mucha y Hoben, pa garantisa nan movilidad, seguridad y participacion.

Naturalesa den Harmonia



Restaura, fortalece y mantene e relacion y conexion entre hende y naturalesa. RAIZ ta comprometi pa logra un Aruba unda realmente ta biba den harmonia cu naturalesa y no solamente di e servicionan cu naturalesa ta provee na nos. Naturalesa no ta solamente un idea of accion, e ta e fundeshi di nos existencia y nos mester realisa cu nos ta un cu naturalesa. Esaki ta encera un responsabilidad existencial y ecologico pa respeta, proteha, preserva, y restaura nos medio ambiente. RAIZ, como unico partido cu tin Naturalesa anca den su statutonan, a demostra di ta para pa naturalesa estableciendo e prome ministerio di Naturalesa den historia di Aruba su gobernacion, estimulando balansa y harmonia.

- Ehecucion y implementacion di National Biodiversity Strategy and Action Plan (NBSAP) cu tin como meta pa harmonisa e desaroyo di e isla cu naturalesa, asegurando cu e beneficianan di biodiversidad ta wordo disfruta awo y tambe door di proximo generacionnan. E plan ta enfatisa e balornan intrinseco di naturalesa. E sistemanan ecologico y biodiversidad di e isla no ta solamente crucial pa balansa ecologico, pero tambe ta sostene turismo, cual ta un parti significante di nos economia. E NBSAP tin tres meta principal y strategico pa atende cu e desafionan aki;
 1. Reduci peliger pa biodiversidad; esaki ta inclui medidanan pa proteha ecosistemanan y habitatnan, controla especienan invasivo y mitiga e impacto di polucion y cambio climatico.
 2. Uzo duradero di recursonan natural: promove practicanan sostenibel den agricultura, pesca y turismo pa asina segura un balansa ecologico a largo plaso.
 3. Hermentnan y solucion pa implementacion; desaroya maneho, leyman y structuranan pa apoya preservacion di biodiversidad y integra esaki den tur sector di sociedad.
- Reenforsa control y ehecucion door di ekipa DNM y BCI cu mas capital humano y autoridad pa sancionnan, como tambe pa tuma accion preventivo pa evita destruccion di naturalesa.
- Garantisa (mas) areanan di naturalesa actualmente protehi den ley teritorial y espacial (ROPV/ ROP), cu lo ser trata den 2025 den Parlamento di Aruba.
- Realisa e expansion di Parke Marino pa cubri rond di Aruba.
- Finalisa Derecho di Naturalesa den constitucion.
- RAMSAR plan di accion y coordinacion pa por sigura cu actividadnan humano ta sostenibel y ta yuda na proteha e saliña / wetlands y costa.
- Continuacion di Western Wetlands National Park Conservation Project, conectado saliñanan y estimulando biodiversidad.
- Percura pa acceso na subsidio pa NGO's di naturalesa y asina logra metanan pa conserva sistemanan ecologico y biodiversidad.

Cambio Climatico



Un Pais resiliente ta atende debidamente cu efectonan di cambio climatico. Pa añas e sistema a enfoka riba calamidad natural pero tambe humano por ehempel door di situacion di refugiadonan. Mientras cu posibilidadnan di dicho calamidadnan ta existi pero no ta sigur, e efectonan di cambio climatico si ta manifestando nan mes y cu un velocidad hopi avansa.

RAIZ ta e BOS di resiliencia pa atende cu e efectonan di cambio climatico como prioridad pa nos comunidad.

- Gobernacion di clima y capacidad institucional pa percura bon structura y continuidad di plan y accionnan.
- Establece Camara di Resiliencia Climatico (CRC) ('KlimaatKamer') cu involucramento di varios stakeholder profesional y (financieramente) independiente.
- Establece Fondo di Resiliencia Climatico (CRF) pa por financia accionnan di mitigacion y adaptacion.
- Integra structuralmente maneho y plan di accion di resiliencia di clima den tur ministerio y departamento publico.
- Desaroya capacidad pa un maneho climatico den tur departamento publico.
- Establece Comision di Naturalesa y Resiliencia Climatico (CRPC) den Parlamento.
- Establece Ministerio di Naturalesa, Energia y Clima pa por atende cu naturalesa den forma eficiente, integral y eficaz.
- Fortalece estadisticanan nacional di naturalesa, medio ambiente, y clima (CBS, DNM, DMA).
- Programa di kita asfalt pa recupera areanan di naturalesa, pa entre otro stimula miho absorpcion di awa, reduci calor di tera y stimula biodiversidad.
- Establece y introduci emision di 'Bonds di Resiliencia Climatico' como forma pa financia accionnan di resiliencia den forma structural.

Turismo Responsabel



RAIZ ta visualisa un Aruba caminda turismo sostenibel cu ta aporta na economia mientras ta priorisa respet pa naturalesa y medio ambiente, y ta yuda crea resiliencia pa cu cambio climatico. E compromiso pa desaroyo sostenibel ta sigura cu cada iniciativa ta mehora nos comunidad, proteha nos rikesa natural y alabes ta ofrece acceso igual pa tur hende.

RAIZ ta e transformador di turismo.

- Lo promove turismo di calidad cu no solamente ta enfoca riba e placa cu e turista ta trece pero e actividadnan den turismo cu ta sostenibel.
- Moratorio DEFINITIVO di mas Hotel.
- Eleva e condicionnan di construccion severamente pa medio di "built with nature, leed certifications y otro tipo di condicionnan sostenibel.
- Environmental levy lo mester bay directamente den fondo di naturalesa y sostenibilidad, creando asina e fondonan pa restauracion y proteccion di naturalesa y fuentenan natural.
- Plan di financiamiento door di Turismo na Transporte, Bienestar Humano, y Educacion pa logra redistribui di manera permanente y structuralmente entrada di turismo (impuesto) pa programanan di bienestar humano y naturalesa.
- Stimula y propaganda arte y cultura, museonan y teatro como e atraccion turistico. Di e forma aki ta duna impulso na e industria Creativo y ta baha e presion y peticion pa actividadnan di impacto negativo halto den naturalesa.
- Introduci un moratorio di 10 aña pa tur acomodacion nobo cu no ta pa e localnan.
- Introduci un moratorio di 5 aña pa tur expansion di acomodacion di turismo.
- Introduci regulacion pa infraestructura di turismo cu prohibicion construccion/expansion di infraestructura den un area di 100 meter for di e costa (pa mitiga riesgo, peliger y dañonan di subida di nivel di lama).
- Introduci regulacion y posibel moratorio di benta di propiedad na extranhero cu no ta residencia na Aruba.
- Regula mercado di huurmento di cas pa vacacion (VHR) door di introduci un licencia di negoshi pa VHR.
- Introduci un 'impuesto di turismo di isla' na entrada (incorporando tur impuesto, tariefnan y belastingnan cu a introduci anteriormente).
- Intensifica relacion y oportunidadnan entre turismo y agricultura cu entre otro programa di eficiencia di energia y awa den sector di turismo.

Change the System: Democracia fuerte



Aruba su sistema democratico, gubernamental y parlamentario mester representa y sirbi abo como ciudadano. E realidad ta cu Aruba a desaroya un cultura politico tradicional cu ta concentra poder na algun partido politico, na luga di empodera e pueblo.

RAIZ ta e forsa pa Change The System.

Pa cambia e sistema di tal forma cu abo ta wordo representa y sirbi debidamente, RAIZ ta propone e siguiente cambionan pa percura cu Gobierno y Parlamento funciona manera mester ta.

- **Transparencia Activo** den Gobernacion cu e meta pa e sistema gubernamental funciona optimal door di garantiza cu e ciudadano tin suficiente acceso na informacion correcto y obhetivo. Gobierno mester ta transparente na un forma activo y innovativo, haciendo informacion accesibel facilmente. E prome pasonan a wordo poni cu creacion di Publico.aw. Den e siguiente termino di gobernacion, e proyecto aki lo wordo desaroya pa logra su proposito y potencial.
- **Participacion Continuo** unda e influencia di un ciudadano riba decisionnan di Gobierno no ta termina despues di deposita su voto. Cu consultanan publico y creacion di plataformanan pa ciudadanonan haya tur informacion relevante, haci pregunta, delibera y conseha Gobierno, por duna ciudadanonan mas influencia den gobernacion di nos pais.
- **Formacion di ministerionan**, basa riba coherencia y eficiencia, na un forma mas structural. Esaki lo yuda promove continuidad den gobernacion y evita cu tin formacion di ministerionan cu combinacion di asuntonan cu no necesariamente tin mucho di haber cu otro.
- Duna prioridad na modernisa leyman existente antiqua, y **umenta e capacidad pa produci leyman necesario**, pa asina percura pa e base legal di pais Aruba ta fuerte. Leyman anticua por stroba e desaroyo di un pais moderno. E efecto di esaki no ta keda limita na desaroyo pero tambe a fomenta e cultura di 'beat the system', unda a basa comportacionnan y habitonan riba e 'loopholes' den ley. RAIZ tambe lo duna prioridad na enforsa nos leyman debidamente (handhaving).
- Introduci **formato nobo pa debati den Parlamento**, garantizando cu debatenan real tuma luga den Parlamento di Aruba. RAIZ ta propone pa debatenan por tuma luga na un forma mas directo y eficiente. Asina parlamentarionan por yega mas facil na e informacion necesario pa eherce nan tarea di controla Gobierno.

Change the System: Democracia fuerte



- **Transparencia Activo den Parlamento** pa crea un miho bista di e trabou cu cada parlamentario ta haci, cu lo ta disponibel na un forma accesibel y innovativo. Esaki ta encera entre otro informacion financiero (gasto di Parlamento y di fraccionnan).
- Revisa Reglement van Orde van de Staten pa efectua di mihor forma e imparcialidad di e funcion di Presidente di Parlamento. E presidencia di Parlamento ta un di e funcionnan mas crucial pa con nos sistema democratico ta funciona. E tin e poder pa influencia con Parlamento por eherce su tarea di controla Gobierno. Fraccion di RAIZ a para pa e imparcialidad necesario cu un Presidente di Parlamento mester tin, cu a hasta conduci na caida di gabinete Wever-Croes 2. E hecho aki a pone luz riba e importancia di tin un Presidente di Parlamento imparcial.
- **Eleccionnan separa pa Parlamento y pa Gobierno**, pa fortifica nos checks and balances y duna e voto di pueblo mas balor. E sistema actual unda e ciudadano ta vota solamente pa Parlamento, mientras candidadonan ta bira minister y otro candidato ta tuma nan luga den Parlamento, ta crea un conflicto di interes pa un sistema den cual ministernan mester duna cuenta na Parlamento. Ta tempo pa hiba e deliberacionnan y consultanan necesario pa implementa eleccion separa.
- **Alocacion di asiento (restsetels) husto**. Pa motibo di e formula pa aloca restsetels, e resultado di nos eleccionnan no ta refleha e deseo di electorado debidamente. Resultadonan di eleccion por desvia hopi di representacion proporcional, cu hopi voto 'desplasa'. RAIZ a percura pa entrega un ley di iniciativa pa cambia con ta aloca restzetels. E ley ta den un fase legislativo avansa y por wordo trata den Parlamento riba termino corto.
- **Derecho di voto pa estudiante den exterior**. Cada aña, cientos di estudiante ta bay studia den exterior. RAIZ kier tene nos studiantenan conecta na nos pais, y ta spera cu nan regresa y contribui na desaroyo di nos pais. Percurando pa derecho di voto pa studiantenan den exterior, ta duna nan influencia riba con nos pais ta desaroya. Pa RAIZ, e influencia aki no ta limita na un voto, pero tambe participacion por medio di consultanan publico.
- **Adapta e ley cu ta regula financiamiento di partido politico**, pa percura pa mas transparencia y regulacion debido di con partidonan politico ta yega na nan fondonan financiero. E ley actual pa regula financiamiento di partido politico ta contene sumanan maximo cuantioso y 'loopholes' cu ta mina e proposito di e propio ley. RAIZ ta propone pa sera e loopholes, reduci e sumanan maximo cuantioso, y percura pa e ley word aplica y enforsa debidamente.

Change the System: Democracia fuerte



- Percura pa transparencia den propaganda politico. Hopi politico, minister y parlamentario ta paga prensa pa cobertura. Mientras esaki no necesariamente ta algo negativo, ta importante pa abo por sa ki ora loke bo ta scuchando of lesando, ta cobertura organico of cobertura paga. Asina bo mes por evalua e cobertura, su contexto y saca bo propio conclusion. E mesun principio di transparencia den propaganda politico por wordo aplica pa otro tipo di propaganda.
- **Institui un Corte Constitucional** pa percura cu derechonan fundamental y procesonan democratico ta ser respecta. Desaroyonan recien a demostra e falta di un instancia pa sigura cumplimiento cu nos Constitucion. Un Corte Constitucional por percura pa fortifica funcionamiento di nos Constitucion. RAIZ a inicia e evaluacion pa realisa un Corte Constitucional pa Aruba y lo sigui e proceso aki den e siguiente termino gubernamental.
- Continua cu e implementacion di reglanan y practicanan di **Good Corporate Governance** den sector (semi-)publico. Esaki ta inclui legislacion y un Corporate Governance Authority cu lo percura pa mas transparencia y miho decisionnan regardando nos sector semi-publico. Por ehempel ora un minister ta nombra directiva y comisario pa un compania estatal.

Relacion den Reino



RAIZ ta para pa bon cooperacion entre paisnan den reino Hulandes y pa activamente busca oportunidadnan di cooperacion cu ta beneficia tur nos ciudadanonan. Bon relacion y cooperacion internacional ta importante pa nos pais. Formando parti di Reino Hulandes, nos partnernan den Reino ta nos aliadonan principal.

RAIZ ta protector di nos autonomia den Reino.

- Establece un departamento pa guia y coordina relacionnan y cooperacion den reino. Un grupo (chikito) di empleadonan publico (existente) lo ta completamente dedica na duna contenido na Aruba su asociacion den Reino Hulandes, manteniendo contactonan, creando oportunidadnan y facilitando cooperacion riba diferente area di gobernacion. E comision tambe por fungi como centro di informacion pa ciudadanonan tocante oportunidadnan den Reino pa estudio, trabou, proyecto, subsidio y mas.
- Colaboracion entre aparatonan gubernamental di paisnan den Reino. Asina nos empleadonan publico por colabora y comparti experiencia y conocimiento. Esaki por percura pa realisa proyectonan y yega na solucionnan na un forma mas eficiente.
- Cooperacion cu Hulanda riba proyectonan (entre otro puntonan den Landspakket) y negosacion riba refinanciamiento di debe pa reduci Aruba su gasto di interes, lo continua. Punto di salida ta cu Aruba ta tuma y mantene responsabilidad den ehecucion di proyectonan cu ta afecta nos ciudadanonan. Asina Gobierno di Aruba ta duna cuenta na Parlamento y na Pueblo pa e resultadonan di e proyectonan.
- E deficit democratico den Reino ta un fayo conoci den e estructura estatal di Reino Hulandes. Un comision local amplio, den consulta extenso, lo yuda determina un vision pa Aruba su posicion den Reino Hulandes y defini posibel cambionan estatal pa trece igualdad (democratico) den Reino. Despues, na un forma proactivo lo bay den deliberacion cu nos partnernan den Reino.
- E bienestar di e ciudadano ta inclui su derechonan democradico. RAIZ lo vigila pa cooperacion den Reino ta constructivo y no ta mina e derechonan democratico di e ciudadano y pais Aruba.

Husticia y Seguridad



Un pais sigur ta un pais dushi pa biba! RAIZ ta identifica criminalidad y actonan contra ley cu ta atacha integridad di nos hendenan y ta forma obstaculo den nos progreso. RAIZ ta propone pa combati criminalidad reenforando e man duro di ley pero tambe den su efecto social den nos comunidad.

- Reenforsa e trabou di polis di barío pa crea un relacion estrecho entre polis di Barío y e comunidad pa combati criminalidad den un forma mas efectivo.
- Crea un sistema penitencionario fuerte garantizando seguridad. Inversion den 'Korrekție Instuut Aruba' cu programa penitenciario extenso di reintegracion y resocialisacion di detenidonan,
- Atende cu situacion serio di condicionnan di trabao y falta di personal, como tambe un infraestructura deplorabel causante di riesgonan halto pa seguridad den nos comunidad.
- Combati agresion y abuso sexual den nos hogarnan. Lo introduci un maneho di minimo dia standarisa di encarcelacion pa melding cu prueba di abuso domestico. Aruba mester cuminsa manda un mensahe cla cu agresion domestico no ta ser tolera. Den caso cu polis mester yega na un melding y constata abuso/ agresion fisico domestico, esaki lo conduci directamente na un detencion automatico y minimo di 14 dia. Ademá lo introduci programa pa sostene y duna guia na victimanan.
- Aumenta castigo pa causa accidente cu consecuencia fatal relata na conduci bou di influencia.
- Facilita proceso di curatela pa adictonan ambulante, haciendo posibel cu Gobierno por pone un adicto ambulante bou di curatela, percurando pa ayudo y programa di rehabilitacion.
- Den e seccion di aparato gubernamental a propone cambio, adaptacion y revisicion di LMA, pa un miho posicion salarial y condicion di trabao di funcionarionan den departamentonan esencial.
- Habri mas klas nan di BOA (Buitengewoon opsporingsambtenaar) pa asina por yuda Cuerpo Policial reenforza leyman cu ta mas amplio riba otro terenan.
- Ekiba e Cuerpo Policial cu mas autoridad y instrumento pa combati cyberbullying (especialmente bou di hobennan)

Bienestar di nos Animal



Nos animalnan y mascotanan ta importante y p'esey ta sigui traha pa mehora e bienestar di tur animal na Aruba. Nos comunidad Aruba lo ta un pais cu empatia y respet pa otro sernan cu tambe ta forma parti di nos bida diario, esaki nos ta yama prosperidad humano, caminda e hende y e animal su bienestar ta central den e desaroyo di nos pais. Pa logra esaki lo implementa e Maneho Bienestar di Animal Aruba (MBAA) 2024-2029.

RAIZ ta e Amigo Fiel di nos animalnan.

- Implementa Ley nobo di bienestar di animal, "Landsverordening Dierenwelzijn". E ley nobo aki ta enfoca ariba e bienestar di nos animalnan domestico y esaki ta rekeri reglanan y structuranan nobo di control cu nos comunidad tin cu cumpli cu'ne. Algun aspecto importante pa cu e ley nobo aki ta entro otro:
 1. Lo Introduci reglanan obligatorio pa cu doñonan pa microchip y sterilisa nan mascotanan, cu ta esencial pa por tin un bista di e cantidad di mascota na Aruba, pa por compara esaki cu un censo di animal. E sistema di registro aki lo wordo amplia y categorisa cu registro di mascota pa cacho y pushi, registro special pa breeders y registro pa otro animalnan domestico cu ta wordo cuida pa consumo of beneficio economico.
 2. Otro aspecto importante ta reglanan stricto pa "breeders" di rasanan di cacho como tambe otro animalnan domestico, pa atende debidamente cu personanan cu ta rasa cacho pa beneficio economico. Lo introduci reglanan stricto y registracion obligatorio pa "breeders", pa por tin mas control y monitoreo ariba tur tipo di breeders, incluyendo e "backyard breeders" pa asina evita cu cachonan ta wordo rasa den un forma abusivo. Como un forma di negoshi lo exige registracion na KvK pa asina cumpli tambe cu ley di belasting.
- Establece e "Afdeling Inspectie Dierenwelzijn" cu e autoridad completo pa reenfora nos Ley na bienestar di nos animalnan, bou di e departamento di Agricultura, Cria Y Pesca (Santa Rosa).
- Establece e 'Animal Welfare Center pa nos animalnan y comunidad' cu e meta pa (1) aloca animalnan cu ta wordo recoge for di ariba caya door di autoridad, (2) cuida y rehabilita animalnan den e centro cu no tin doño y cu por wordo adopta, (3) ofrece servicionan manera adoptacion, ayudo cu cuminda y informacion di cuidado general di mascota y otro animalnan domestico, (4) ofrece servicionan medico na animalnan domestico, (5) ofrece espacio di "cuarentena" pa animalnan protehi cu wordo confisca na frontera di nos pais. E 'Animal Welfare Center' lo fungi como un "community resource center" caminda nos hendenan por yega y wordo asisti den un forma of otro cu nan animalnan.

Bienestar di nos Animal



- Inverti den Programanan di “sterilisacion” pa reduci crecemento di poblacion di cacho y pushi . Pa realiza esaki lo amplia e colaboracion y sosten na NGO’s local cu a bin ta haci e trabounan aki pa hopi aña caba. Lo sigui aporta na e causa aki pa asina nos comunidad por ricibi e ayudo aki den un forma gratuito.
- Introduci un “bellijn” pa raporta asuntonan di animal, pa sigura cu nos por garantisa e mehoracion di e bienestar di nos animalnan y trata asuntonan di animalnan domestico. E bellijn aki lo fungi como e prome paso pa nos comunidad por haya informacion, raporta asuntonan of problemanan di animal, y pa aplica na programanan pa ayudo cu nan mascota por ehempel; ayudo cu cuminda.
- Bienestar di animal den educacion preparatorio, primario y secundario, unda ta reconoce e importancia di conscientisacion pa cu no solamente e responsabilidad como ciudadano pa cu nan mascota, pero pa tur animalnan y tambe nos naturalesa.
- Inverti den un “cultura di compasion”, promoviendo cambio di cultura y pensamiento ora ta trata di animalnan, y esaki ta rekeri inversion den re-educacion social di e comunidad. Cu re-educacion social lo enfoca riba material di comunicacion di balor y norma como comunidad, custumbenan, e respet pa otro ser y tambe ley y reglanan cu ta aplica na cada ciudadano.
- Inverti den programanan cu ta encurasha iniciativanan di compasion entre otro pa hisa e nivel di adoptacion y participacion como boluntario na nos NGO’s local. Nos ta responsabel pa educa y informa nos comunidad cu materialnan di comunicacion y iniciativanan cu ta enfoca ariba aspectonan social cu lo haci un impacto ariba nos “mind-set” pa asina crea normanan “nobo” cu lo sigura e bienestar di nos animalnan.
- Enfoca ariba sostenibilidad di nos medio ambiente, cu atencion y regulacion pa desperdicio di karkas (bestia y animalnan morto). Responsabilidad di doño no ta exclusivamente ora e bestia ta na bida pero tambe na e momento cu e fayece y su restonan.

Agricultura, Cria y Pesca



E sector primario, Agricultura, Cria y Pesca ta vital den nos comunidad, contribuyendo na nos siguridad di alimentacion, fortificando nos herencia cultural, y estimulando nos auto determinacion. Ademas agricultura, cria y pesca den forma sostenibel ta aporta na crecimiento economico.

RAIZ ta bo cultivador di agricultura, cria y pesca.

- Implementacion di e maneho "hunto nos ta Cosecha e Futuro, pa 2023-2028, cu ta delinea metanan pa promove e sector di agricultura, criansa di bestia y pesca na Aruba. E maneho ta delinea iniciativanan pa fortifica sector primario pa medio di:
 1. Stimula practicanan sostenibel.
 2. Reformanan regulatorio den ful e sector garantiza e cuadro legal pa e sector, como tambe fortifica e rol y funcionamiento di e Departamento di Agricultura, Cria y Pesca na bienestar di e sector y comunidad general.
 3. Esfuersonan educativo pa aumenta conscientisacion pa cu sostenibilidad ambiental den plantamento, cria y pesca.
 4. Apoya crecimiento di e sector agricola mediante analisis di mercado
 5. Programa di Desaroyo Agripreneurial, proveendo startups cu recursonan y entrenamiento pa innova y expande.
 6. Revisionnan na e Ordenansa di Pesca cu e meta pa promove pesca sostenibel cu participacion di ciudadano/piscado.
- Finalisa e ley di regulacion di 'tira pisca' (spearfishing').
- Percura pa bon administracion y mantencion di piernan pa piscado.
- Percura pa maneho di areanan destina pa agricultura y cria di bestia ta bou di maneho di DLVV.
- Ekipa DLVV cu personal y conocimiento pa por eherce su tarea den e sector como tambe di control y ehecucion(Afdeling inspectie).
- Establece coleccion di awa decentralisa den diferente distrito y regionnan ('Awa den Bario') den relacion cu maneho centralisa di awa (grid).

Cultura y Arte



E identidad di nos hendenan ta ancla den nos cultura. Cultura y arte ta esencial den nos formacion como tambe den fortifica e conexion entre hende. Crea oportunidad pa tur hende por desaroya nan talento, disfruta di arte y cultura y participa activamente den deporte. Expresion den formanan aki ta ser considera como instrumento clave pa salud y bienestar general.

RAIZ ta bo promotor di cultura.

- Diversifica economia di Aruba cu pilar creativo y cultural, defini nos propio **Orange Economy** cu por fungi como un catalista innovativo y contribui significativamente na nos GDP. Lo inverti den nos orange economy pa por engradece nos expresion creativo y cultural caminda creativonan local por produci producto y servicionan cu ta posiciona Aruba como un isla unico den Caribe. Alabes di crecimiento economico, lo enfoca ariba e preservacion di nos herencia y identidad cultural. Estableciendo nos mesun "Aruba Orange Economy" lo contribui como un otro pilar economico pa nos pais.
- Crea un framework legal y regulatorio pa nos "Aruba Orange Economy".
- Inverti den nos Identidad y Herencia Cultural".
- Inverti den Sanicolos como nos destinacion cultural.
- Promove proteccion di propiedad intelectual.
- Inverti den nos departamentonan y organisacionnan cultural y creativo.
- Inverti den programanan pa "creative entrepreneurship".
- Inverti strategicamente den programanan di educacion cultural y creativo.
- Promove nos creatividad y cultura cu "Made in Aruba" como un marca global.
- Carchi "ACTIVO" unda ta subsidia hoben y adultonan mayor pa participa na programanan di arte, cultura, deporte y desaroyo social de nan escogencia den conexion cu transporte publico.



Deporte ta un instrumento fuerte pa desaroyo di nos muchanan y alabes ta contribui grandimente den promove un comunidad saludabel. Deporte mester ta accesibel, inclusivo, y vital den bida di cada habitante, estimulando salud, union, y oportunidad pa tur hende.

RAIZ ta e promotor di deporte den nos comunidad.

- Desaroyo Programa di Deporte comunitario pa medio di carchi "ACTIVO" unda ta subsidia hoben y adultonan mayor pa haci deporte y participa na programanan di arte, cultura y desaroyo social de nan escogencia den conexion cu transporte publico.
- Sistema mas eficiente y efectivo pa mantene facilidadnan. Mester percura cu den mantencion tin un sistema solido cu ta garantisa continuidad.
- Inversion den entrenamiento di coach y leaders local pa eleva e calidad di deporte, tecnica y alabes cu atencion riba e parti formativo den deporte pa e grupo di meta (mucha, adulto mayor).
- Establece evento comunitario regular introduciendo dia 'ACTIVO' cu Deporte y Movercion den bario mensualmente unda ta cera camindanan den bario pa tur hende por practica deporte gratuitamente y liber.
- Colaboracion pa incentiva di salud na pia di trabao, percurando cu organisacionnan di salud y movercion ta yega negoshinan den forma structral pa empleadonan por dedica na movercion y keda activo na trabao.
- Promoviendo mas 'standing desks' unda cu na pia di trabou, bo ta promove miho circulacion di sanger pa no keda sinta pa oranan largo riba un dia.
- Promove 'walking spaces' na trabou door di tin localidadnan special pa cana/move of treadmills unda cu den ora di break por cana un rato despues di come.

Transporte



Transporte ta esencial pa bienestar, pasobra e ta conecta hende cu e necesidad y oportunidadnan basico cu ta mehora calidad di bida. Bon posibilidad di transporte ta sigura cu hende por yega facilmente na cuidado medico, educacion, trabou y contacto social. Transporte ta ser categorisa bou di transporte publico, transporte maritimo y aereo.

RAIZ ta bo mobilisador den transporte.

- Finalisa adaptacion di ley pa Personen Vervoer pa percura un sistema transparente, husto, y cu ta brinda oportunidad igual den otorgamento di permiso.
- Hisa movilidad di nos hendenan door di revisa rutanen di Arubus NV y autobus.
- Crea conectividad social pa medio di **"Carchi ACTIVO"** unda ta subsidia deporte, arte y cultura pa medio di carchi nan di bus.
- Introduci vergunning special pa transporte di mucha y adulto mayor garantizando nan seguridad y movilidad.
- Crea y expande un modelo hub-space cu hubnan den diferente districto, formando busstopnan inteligente (e.o. cu panel solar, vegetacion berde, generacion di energia, y wi-fi 'Cool (bus-) Stops'). Lo considera incorpora arte creativo riba diseño di 'Cool Stops' ('Bus den Bario').
- Establece Plan Espacial Marino (M-ROPV) pa miho control y seguridad den nos awanan territorial.
- Mehora regulacion/maneho di actividadnan maritimo.
- Fortifica control pa garantiza seguridad di actividadnan maritimo.
- Maximalisa potencial economico maritimo door di elimina artiestenheffing cu ta un obstaculo pa rebiba e comercio di anker y plataformanan.
- Adaptacion di Leynan di aviacion y sector maritimo pa fortifica garantiza seguridad y cumplimiento standard y regulacion internacional.

Aparato Gubernamental



E aparato gubernamental tin potencialnan pa fortifica. Mientras cu den mayoria situacion ta ser mira den luz negativo, RAIZ ta kere den logra e maximo eficiencia y servicio, reduciendo gasto pa por sirbi Aruba miho y logra metanan colectivo di pais Aruba.

RAIZ ta e maximalisador den e potencial gubernamental.

- Estudio y recomendacion di Landspakket lo fungi como e base di reorganizacion di e aparato pa uno mas eficiente y efectivo.
- Un atencion di prioridad ta e reparticion eficiente di e cantidad di ambtenaar, na e departamentonan concerni. Di e forma aki ta atende cu departamentonan cu ta esencial pero ta lucha cu falta di trahado.
- Banda di efectua analyses profundo pa corta den e "vetnan" y baha gasto, lo implementa e plan pa hisa rendibilidad di e aparato. Esaki ta encera hisa e ingresonan administrativo (p.e leges en retributies') cu ta anticua, no cu e meta di ganashi pero si pa por cubri gasto.
- Eleva e calidad di servicio cu departamentonan di Gobierno ta duna ciudadanonan, entre otro door di facilita y empodera e departamentonan cu e infraestructura necesario pa duna un miho servicio.
- Revision di e Landsverordening Materieel Ambtenarenrecht (LMA), pa adapta esaki na e desaroyonan laboral di e tempo aki, como tambe percura diferenciacion di estructura salarial pa cada departamento, cu ta adapta na e competencia riba mercado priva unda por atrae y mantene e profesionalnan cu e aparato mester den cada departamento. E punto di salida ta cu no ta tur departamento ta exige e mesun tipo y cualificacion di trahado/ profesional. E LMA actual falta alineacion cu e mercado laboral (salarionan, pero tambe oferta y demanda) den sector priva.



Innovacion global ta avansando rapidamente. E recursonan cu ta wordo inverti den innovacion, ta destina pa mehora y engrandece nos forma di biba actual. Mientras cu nos isla chikito definitivamente ta haci su esfuerso, nos progreso ta relativamente slow. E problema ta cuminsa cu un falta di un vision holistico na e nivelnan mas halto.

RAIZ ta propone un manera diferente di pensa tocante innovacion door di crea un framework pa un sociedad cu ta *Smart, Open & Resilient*. Door di enfoca riba turismo sostenibel, optimalisacion di recurso, energia renobabel, open data, R&D y desaroyo di talento local, nos por construi un sociedad prepara pa futuro cu ta hasi uzo di tecnologia y innovacion pa e bienestar general di nos pais.

Open Data

Gobierno ta colecta un cantidad grandi di data cu por wordo uza pa promove innovacion y mehora servicionan publico. Door di habri datasets clave—manera data di medio ambiente, gastonan publico, y trends di turismo—nos por empodera empresarionan local, researchers, y developers pa crea servicionan y productonan nobo cu ta atende na e necesidadnan unico di nos isla.

- Door di crea maneho/leynan cu ta permiti comparticion di data di gobierno via API's (application programming interfaces), nos por permiti developers pa crea apps y servicionan cu ta mehora e bida diario riba nos isla. Por ehempel, cu API por conecta diferente departamentonan y asina ofrece ciudadano y empresario maneranan nobo y automatiza pa yena y entrega impuesto.
- Mientras nos ta encurasha open data, proteccion di privacidad individual ta un prioridad principal. Cualquier data comparti publicamente mester wordo anonimisa y maneha cu manehonan estricto di proteccion di data pa asina por salvaguardia informacion personal.

Open Banking & Finance

Un ecosistema moderno di FinTech ta esencial pa accelera innovacion y mehora acceso na servicionan financiero riba nos isla. Como cu nos ta un economia di isla chikito cu un enfoke grandi riba turismo y negoshinan chikito, nos por beneficia grandemente door di integra sistemanan di pago avansa y modelonan di open banking cu ta aumenta inclusion financiero, apoya empresario, y simplifica transaccionnan. Adoptando principianan di open banking lo permiti nos sistema financiero bira mas innovativo, competitivo, y accesibel.



- Mirando e cantidad halto di bishitantenan internacional, nos sistemanan di pago mester ta facil pa uza y sigur. E adopcion di plataformanan di pago digital, incluyendo pagonan via smartphones, smart watches y e-wallets, por simplifica transaccionnan pa turistanan mientras ta provee conveniencia pa localnan.

Open-Source Software

E adopcion di open-source software ta ofrece Aruba un oportunidad pa tuma mas control di nos infraestructura digital, reduciendo asina dependencia riba sistemanan caro y propietario. Open-source no solamente ta encurasha transparencia, ya cu e source code ta disponibel abiertamente pa inspeccion y modificacion pero tambe e ta promove innovacion local door di empodera talento local pa contribui na e code.

- Door di adopta open-source, Aruba por cultiva un tech ecosystem local vibrante cu ta encurasha innovacion, entrepreneurship, y comparticion di conocimiento entre developers, negoshinan, y institutonan educativo. Involucrando talento local den mantencion y mehoracion di sistemanan di gobierno, por crea cuponan di trabou, stimula e industria local, y reduci e necesidad pa experticio di afo.

Tech & Innovation Hub

Pa sigui aumenta e capacidad di Aruba riba tereno di innovacion, e ta importante pa establece un tech & innovation hub—un espacio dedica na unda e sectornan publico, priva, y academico por colabora riba iniciativanan di tecnologia. E hub aki lo sirbi como un centro pa enseñansa, research & development (R&D), y e desaroyo di ideanan nobo, posicionando Aruba como un lider regional den innovacion. Door di establece un ambiente di R&D y colaboracion nos por promove ideanan cu por hiba na innovacionnan revolucionario cu ta mehora bida riba nos isla mientras tambe ta crea oportunidadnan economico nobo.

- Un tech & innovation hub lo provee un plataforma pa sector priva, sector publico y academia pa traha hunto riba proyectonan cu ta atende problemanan local, manera establece un infraestructura smart & open, sustainable tourism pa reduci e impacto ambiental, of R&D den renewable energy nobo manera wave energy cu por genera corriente for di movencion di lama.
- Door di organisa workshops, seminarionan, y hackathons, un tech & innovation hub lo encurasha e comparticion di conocimiento y habilidadnan entre e comunidad di tech di nos isla. E lo facilita tambe partnerships cu organisacionnan internacional, permitiendone importacion di e miho practicanan y experticio global, cu por wordo adapta na e contexto specifico di Aruba.



- Actualmente Aruba tin un Departamento pa Innovacion riba papel, pero no ta operacional ainda. E proposito y metanan pa e departamento aki mester wordo ahusta pa e por cumpli debidamente cu su rol clave den implementacion di e maneho di innovacion.

Knowledge & Skill Sharing

Compartiendo conocimiento y habilidad entre sector publico y priva ta esencial pa contribui na un resilient society. Door di promove un cultura di colaboracion, siñamento continuo, y innovacion, nos por sigura cu nos ta prepara pa retonan di futuro y por capitalisa riba oportunidadnan.

- Ekipa ciudadadanonan cu e habilidadnan necesario pa un mundo digital cu ta evolucionando rapidamente, programanan di training ta necesario. Esakinan por ta enfoca riba areanan esencial manera digital literacy (entre otro inteligencia artificial) y business continuity. Pa percura pa nos tin un sociedad innovativo y resistente, mas prioridad tin cu wordo duna tambe na educacionan STEM ('Science', 'Technology', 'Engineering', 'Mathematics') pa stimula interes den STEM for di un edad jong. departamento. E punto di salida ta cu no ta tur departamento ta exige e mesun tipo y cualificacion di trahado/ profesional. E LMA actual falta alineacion cu e mercado laboral (salarionan, pero tambe oferta y demanda) den sector priva.

#RAIZNOSTA



Cu bo confiansa, nos por sigui cu e trabounan cu nos a cuminsa, y sigui diversifica politica na Aruba. Enfrentando e retonan di awe y construyendo oportunidadnan pa mañan.

Dia 6 di december —Fortifica Bo Pais, Vota RAIZ.



Statenverkiezingen Aruba 2024

[f](#) [@](#) [v](#) [www.raizaruba.com](#) | **Biba Bon, Biba Contento!**